



## Pindaan Akta Suruhanjaya Hak Asasi Manusia dibentang di Parlimen minggu depan - Azalina

Oleh Latifah Arifin - November 20, 2023 @ 12:46pm

latifah@bh.com.my

KUALA LUMPUR: Pindaan Akta Suruhanjaya Hak Asasi Manusia Malaysia 1999 antaranya bagi menubuhkan Suruhanjaya Kanak-Kanak Malaysia, dijangka dibentangkan sebelum sesi Dewan Rakyat berakhir 30 November ini.

Menteri di Jabatan Perdana Menteri (Undang-undang dan Reformasi Institusi), Datuk Seri Azalina Othman Said, berkata beliau berharap sekurang-kurangnya bacaan pertama RUU itu dapat dilaksanakan tahun ini.

"Selepas Rang Undang-Undang Perbekalan 2024 selesai, kami ada tiga hari untuk pembentangan rang undang-undang lain, jadi kami cuba juga pada sesi kali ini, ada masa untuk pastikan bacaan kali pertama dapat kami lakukan.

"Bagaimanapun, buat masa ini, kami tumpu sehingga Rang Undang-Undang Perbekalan 2024 selesai dan diluluskan Parlimen," katanya kepada pemberita selepas meninjau Pameran Hari Kanak-Kanak Sedunia sempena sambutan Hari Kanak-Kanak Sedunia 2023 hari ini.

Sebelum ini, Azalina memaklumkan, akta khusus untuk suruhanjaya kanak-kanak di negara ini bertujuan menubuhkan sebuah badan bebas bagi menegakkan hak semua kanak-kanak di Malaysia.

Beliau berkata akta itu turut menjadi kesinambungan kepada pelantikan Pesuruhjaya Kanak-Kanak.

Pada masa sama, Azalina berharap semua pihak bersatu hati dalam hal dan isu berkaitan perlindungan serta hak kanak-kanak yang dibawa ke Dewan Rakyat mahupun Dewan Negara.

"Saya berpendapat isu mengenai golongan rentan terutama kanak-kanak perlu dijadikan realiti dengan penyertaan Ahli Parlimen daripada kedua-dua belah pihak... anda perlu bersatu padu demi kanak-kanak," katanya.